



Diabierna 10 Februari 2023

Email: IslaOnline@gobierno.aw Tel: 528-4952




ISLAONLINE

Noticia di Gobierno

2023





PROME MINISTER TA REUNI CU INSTITUTONAN DI ESTADISTICA CBS DI ARUBA Y ECLAC DI NACIONNAN UNI



Diabierna 10 di februari mainta, Prome Minister Evelyn Wever-Croes a reuni cu representantenan di Centraal Bureau Statistiek (CBS) y tambe cu representante di e agencia di Nacionnan Uni, Economic Commission for Latin America and the Caribbean (ECLAC) cu ta atende cu e sistemanan di estadistica. Hunto cu Nacionnan Uni, ta desaroyando un Sistema Nacional di Estadistica cu ta bay yuda Aruba pa tin tur e datanan necesario, no solamente pa Gobierno pero tambe pa otro institutonan.

Prome Minister a duna di conoce cu e datanan y informacionnan aki no ta di personanan individual cu lo por comparti, pero si ta categorisa gruponan por ehempel, cuanto hende muhe tin den cual edad, cuanto mucha homber tin den cual edad, cuanto scol tin y cuanto muchanan ta naciendo of cuanto a nace. E ultimo aki lo yuda entre otro pa sa cuanto scol lo mester tin pa futuro.

Prome Minister a indica cu hopi di e decisionnan di Gobierno riba maneho mester ta basa riba data pero no ta tur esakinan ta disponibel. CBS hunto cu e agencia di Nacionnan Uni pero tambe den cuadro di landspakket hunto cu Hulanda, a haya financiamiento pa e proyecto aki. Ambos instituo a informa Prome Minister di e desaroyonan y trabounan cu ta wordo haci pa realisa y termina e proyecto aki.

Aparte di e sistema mes di estadistica cu ta desaroyando, tambe lo adapta e leynan necesario pa asina e personanan



cu participa por ehempel den encuesta of censonan, tin mas proteccion pa nan informacionnan no wordo maluzá den otro manera. Pasobra ora bo tin estadistica y sigur automatiza, tin chens cu otro persona por mira informacionnan cu no ta pa nan wowo mira. E ley lo wordo traha e aña aki y lo ta cla pa fin di aña. Esaki lo trece mas proteccion pa tur esnan cu tin data centralisa den e sistema aki.

“Mi mester bisa cu esaki ta un di e proyectonan cu nos a para duro ariba pa nos haya hunto cu Nacionnan Uni ya den e prome biaha na Nacionnan Uni. Mi ta contento di wak cu nos biahenan ta duna fruto y cu awor nos ta asina leu di mira e aña aki su cuadro legal y despues e sistema mes por wordo implementa”, Prome Minister Evelyn Wever-Croes a duna di conoce.



MINISTER XIOMARA MADURO A REUNI CU SRA. ANNA PAOLINI CU TA E REPRESENTANTE NOBO DI UNESCO PA REGION DI CARIBE



Recientemente un grupo grandi di Nacionnan Uni tabata na Aruba pa asina cera conoci cu Conseho di Minister y tambe cu diferente instancia na Aruba, pa asina por fortifica e lasonan di trabou y asistencia cu nan por brinda na Aruba. Den cuadro di e bishita aki, Minister Maduro di Cultura a reuni cu sra. Anna Paolini cu ta e representante nobo di UNESCO pa region di Caribe. E reunion a tuma luga cu presencia di Secretario General di UNESCO na Aruba, sra. Marushka Tromp y sr. Mark Oduber cu ta e especialista encarga cu e parti di ciencia pa e Secretariado di UNESCO na Aruba.

Sra. Paolini a haci uzo di e reunion pa asina presenta su credencialnan oficial na Minister Maduro y tambe pa conta mas di e cambionan cu a tuma luga den UNESCO pa e forma di brinda asistencia na e Paisnan den Caribe. Como miembro asocia di UNESCO, Aruba lo wordo yuda cu asistencia via e oficina di UNESCO na Jamaica.

Minister Maduro ta gradici sra. Paolini pa e bon relacion y asistencia cu Aruba a bin ta haya di UNESCO, unda recientemente cuater scol na Aruba ta participando den e netwerk di scolnan di UNESCO na unda alumnonan ta siña mas di e 17 metanan di desaroyo sostenibel di Nacionnan Uni.



Pa por sa mas kico e Secretariado di UNESCO ta haci na Aruba, Minister Maduro ta invita pa mira e segunda di parti di e programa informativo riba UNESCO cu lo pasa dialuna dia 13 di februari 2023 pa 7'or di anochi na TeleAruba y diamars dia 14 di februari pa 8'or di anochi na Diario TV.

MINISTER MADURO A REUNI CU E HUNTA DI COMISARIO DI BANCO CENTRAL PA REPASA AÑA 2022 Y PA PASA DEN LOCUAL POR SPERA PA AÑA 2023 RIBA E TERENO FINANCIERO

E siman aki Minister Maduro di Finansa a tene su prome reunion pa aña 2023 cu e Hunta di Comisario di Banco Central, cu ta consisti di e Comisario pa Gobierno sr. Arie Swaen y Comisarionan sra. Yvonne Escalona, sr. Tico Croes y sr. Ling Wong kende recientemente a keda apunta den e Hunta di Comisario di Banco Central.

Durante e reunion e mandatario a repasa e retonan financiero di aña 2022 y a brinda un bista riba kico por spera pa aña 2023 riba e tereno financiero na nos Pais. Banco Central ta hunga un rol importante pa e integridad y estabilidad financiero di nos Pais. E Hunta di Comisario ta tene bista riba e trabounan di Banco Central y ta reuni cada pasa tempo cu Minister di Finansa pa keda na altura di e maneho financiero di Gobierno.




MINISTER MADURO TA FELICITA DIRECTOR DI DEPARTAMENTO DI FINANSA, SR. DERRICK WERLEMAN CU SU 20 ANIVERSARIO DEN SERVICIO DEN GOBIERNO

Director di Departamento di Finansa di Gobierno di Aruba, sr. Derrick Werleman, a cumpli 20 aña den servicio publico. Pa recorda e aniversario aki Minister Maduro a invita Derrick y su señora Erica pa por gradici pa e añanan dedica na e servicio publico na bienestar di Aruba.

Normalmente 20 aña no ta un aniversario di trabou cu ta wordo recorda den e servicio publico. Minister Maduro a haci un excepcion pa brinda un atencion special na Derrick, ya cu riba e tereno financiero ultimo tempo trabounan grandi a wordo haci pa por mehora nos finansa publico y varios trabou a wordo lidera pa su persona hunto cu e staf y personal di Departamento di Finansa. Pa e motibo aki Minister Maduro no kier a laga e aniversario aki pasa sin para keto y brinda e atencion mereci na Derrick.

Minister Maduro ta gradici Derrick pa tur trabou haci durante e 20 añanan di servicio y ta spera cu Gobierno di Aruba por sigui conta cu mas aña di su trabou dedica na bienestar di Aruba.





TRABOU DI CONSTRUCCION DI SCOL BASICO SINT ALOYSIUS TA AVANSANDO

Aña escolar 2023 -2024 alumno y docentenan por ta bek na nan scol

Diahuebs mainta, Minister Endy Croes a bishita Sint Aloysius School pa mira con e trabou di construcccion ta avansando. Na fin di luna di april 2022, por medio di conferencia di prensa, di Gobierno di Aruba, a anuncia y presenta e proyecto di renobacion di e scol. Minister Endy Croes a indica cu un problema cu a hereda ta cu diferente scol e infraestructura ta pafo di nan edificio. Cual ta haci cu e scolnan ta huur otro edificio pa por duna continuacion na enseñansa.

Mandatario di Enseñansa a analisa esaki y un di e prome scolnan cu e tabata determina pa inverti den dje y drecha ta Sint Aloysius School. Minister Endy Croes a sigui bisa cu e renobacion di Sint Aloysius School ta wordo subsidia cu placa di subsidio na SKOA. SKOA ta responsabel pa e renobacion den su totalidad. Un total di diesdos (12) klas lokaal a wordo renoba y modernisa. E edificio banda panort cu tabata completamente afgekeurd a wordo drecha a pone dak, blafon y tegels nobo. A construi oficina nobo, koffie kamer, biblioteca como tambe a traha un pos completamente nobo. E dos bañonan a wordo realoca y traha completamente di nobo. Tambe a construi un gymzaal, ya caba e piso a wordo basha. Na final DOW lo renoba e speelplaats completo.

Minister Endy Croes a enfatisa cu ta cumpliendo cu e vision di Gabinete Wever - Croes II cual ta encera inverti den infraestructura di scol, pa asina nos muchanan tin un bon luga pa nan por haya educacion. Concluyendo, Minister Endy Croes a expresa palabranan di pabien na Gabinete Wever - Croes II, paso ta bou di e Gabinete aki e renobacion a inicia. Como tambe Mandatario di Enseñansa ta felicita ful e ekipo cu a duna conseho na Ministerio di Enseñansa y e boluntad extra pa ta eficiente cu loke nos tin pa logra renoba Sint Aloysius School. Pa aña escolar nobo, Sint Aloysius School ta wordo entrega bek completamente renoba y modernisa na unda cu docente y alumnonan por bin bek na nan cas original. Minister Endy Croes ta contento y ta keda monitor e renobacion pa pronto entrega e bunita proyecto.



MINISTER ENDY CROES A DUNA E GRAN INICIO NA E EXCELENTE SUNSET PARADE DI NOORD 2023

Diaranson ultimo, a tuma luga di nueve edicion di e Sunset Parade den e barrio di Noord. E parada a sali pa 7'or di anochi y a conta cu nueve grupo e.o. grupo di carnaval, diferente banda, steel band, brassband, DJ y last lap. Sunset Parade a cuminsa for di Cheng's Supermarket y a finalisa na CMB branch.

Minister Endy Croes acompaña pa su esposa Dilailah Croes – Odor y famia a disfruta di e bunita Sunset Parade. Un publico sumamente grandi a disfruta di e parada cu hopi zjeito, un ambiente total. Minister Endy Croes ta felicita Bernardito Faro y ekipo cu a organisa un tremendo Sunset Parade. Minister Endy Croes ta desea pueblo di Aruba un dushi y safe Carnaval 69.






RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad, Naturalesa y Asuntonan di Adulto Mayor

"Nada no ta cambia, si nada no cambia!
Reconoce bo impacto, un Aruba dushi ta un Aruba cu nos por maneha nos sushi!"
Minister Ursell Arends

www.trashtocasharuba.org

Pa mas informacion:
<https://trashtocasharuba.org/pages/dump-parkietenbos>

CARGA RESPONSABILIDAD TA MAS IMPORTANTE CU TRATA DI SER UN HEROE.

PRESIDENTE DI UKRANIA PRESIDENTE VOLODIMIR ZELENSKY

Ora un ciudadano ta carga su responsabilidad, e por bira un heroe. Pero si e no carga su responsabilidad, e no por bira un heroe. Cada un ciudadano tin un responsabilidad di carga pa hiba nos famia y nos pais padilanti. Algun tin un responsabilidad mas grandi cu otro. Pero echo ta cu nos tur mester carga nos responsabilidad. Ban sigui carga nos responsabilidad pa un Aruba integro. Nos no por pas'e pa nos futuro generacion. **Ban hunto, den union, y cu positivismo, nos carga nos responsabilidad.**



— AÑA DI UNION Y POSITIVISMO! —